

Presidente di Parlamento drs. Marisol Lopez Tromp:

Parlamento a aproba su propio simbolo cu ta un shoco

Parlamento di Aruba conoce awor un simbolo nobo den forma di un shoco cu ta representa e simbolo y identidad di e instancia. Den un forma unanime Parlamento a aproba nan logo nobo. Ta importante pa reconoce Parlamento como un instituto di e pais y pa duna esey e balor y contenido manera mester ta, ta importante pa Parlamento ta autonomo ya cu Parlamento mester ta independiente pa asina e por haci su trabou di controla gobierno miho posibel. Naturalmente tin 21 miembro cu ta haci nan trabou pero tin tambe e personal cu ta sostene e parlamentarianan den nan trabou, manera traha ley y trece cambianan den ley of bin cu amienda. Pa haci esaki miho, mester di personal profesional pa asisti e parlamentarianan den nan trabou..

Parlamento di Aruba tin su historia y ta existi desde di 1986. Loke ta importante ta pa Parlamento ta independiente financieramente tambe y

esaki ta encera cu Parlamento tin su propio presupuesto a pesar cu e placa aki tambe ta sali di e presupuesto di pais Aruba. Autonomia tin su beneficiacion ya cu di e forma aki Parlamento por haci su trabou miho cual ta encera control di gobierno. Esun cu ta controla no por depende di esun cu e mester controla. Pa duna un ehempel: awendia si Parlamento mester di un personal nobo esaki mester wordo aproba den consejo di minister a pesar cu ta Parlamento ta haci e proposicion y maske cu henter Parlamento ta carga e proposicion aki. Aruba ainda no ta full autonomo ya cu ta den consejo di minister mester aproba cierto decisionnan.

Esun cu ta haci e trabou di controla mester por funciona mas los y mas independiente for di e gobierno cu e tin cu controla diariamente. Aruba ta e unico pais den Reino cu ainda cu no tin un Parlamento autonomo. Aruba ta trahando duro pa haci e

cambianan necesario den e ley di contabilidad y tambe den nos constitucion pa haci Parlamento mas autonomo posibel. Asina Parlamento lo por tuma su mesun decisionnan. No obstante signatura politico of cual partido ta na

mando, Parlamento como instituto mester wordo fortifica mas tanto y esaki lo por si independisa Parlamento. Ya caba Parlamento tin su propio canal di television y tambe website y esakinan ta habri pa publico. Di e forma aki



pueblo por sigui tur desaroyo den Parlamento di Aruba di cerca.

Parlamento lo uza e simbolo di e shoco na luga di e escudo di Aruba cual ta e simbolo cu gobierno ta uza. E strea riba e frenta di e shoco ta representa tur e nacionalidadnan cu tin riba nos pais y cu ta forma e comunidad di Aruba y cual ta e comunidad cu e Parlamentarianan ta para pe y mester representa. Un shoco tin e habilidad pa mira den scuridad y ta spera cu e Parlamentarianan lo sa di mira door di tur sorto di scuridad kico ta e caminda cu nan mester tuma. Tambe e wowonan geel ta representa nos solo. E shoco ta un parha cu ta para firme riba suela y aki a pone e shoco memey di e aloenan. E color di oro ta representa e balor di nos Parlamento y e 21 plumanan ta e 21 parlamentarianan cu ta representa nos pais.